

嘉慶松江府志

松江府志卷五十二

古今人傳四

明

張弼字汝弼華亭人成化二年進士初授兵部主事轉員外郎出知南安府郡當兩廣要衝奸人多藏聚山谷悉捕滅之有誣人劫財陷其家於死者立爲辨釋大庾嶺商旅往來民藉雇直之利後奪於南雄遂以貧瘠弼請中分之又以其路險隘取商稅餽工闢抬架橋甃石二十里以便行者毀淫祠設社學立張九齡劉安世濂溪二程及李綱祠築鐵漢樓風月臺示學者標準俗爲一

變謝病歸士民立祠年六十三卒弼襟度恬曠敦尙行履以風節自持詩文清健有風骨尤以草書名人多藏弄焉子宏宜字時措成化十七年進士由寧海令入爲南御史謫判蘄州擢沔陽守進雲南僉事轉廣西兵備副使所至有治績以從征徭徭勞瘁卒於官民咸追思之宏至字時行宏治九年進士改庶吉士授兵科給事中以災異上疏陳初政漸不克終八事辭旨剴切有諫臣風又請覈騰驤四衛侵冒弊武宗時奉使安南還遷都給事中以母憂歸卒

葉志

張誥字汝欽華亭人居鶴城里成化二年進士改翰林院

庶吉士授監察御史出按湖廣有能聲陞廣東按察司副使改四川尋陞按察使宏治初歲饑誥請裁荆襄等衛兌運又發庫銀易米得數十餘萬石隨在賑貸所全活頗多陞貴州左布政使未幾陞都察院右副都御史巡撫雲南雪疑獄遏蠹蠻木邦孟密二部連兵不解誥檄諸道練兵爲必討計竝懾服自戢朝廷嘉其功厚賞賚焉宏治元年乞歸誥有才幹然頗用嚴厲其在雲南幾及於禍正德六年卒年七十九

郭志名臣

柳淳字文粹華亭修竹鄉人也少從舅氏袁愷受經成化二年成進士授行人選監察御史巡視京畿捕治渠賊

劉釗三輔屏息更按西蜀時成都多火災民間囊篋悉  
置戶外淳多置街卒防護戶令蓄水備非常民得安枕  
擢貴州憲副值歲饑計口振給賴以全活者數萬人量  
移山東按察使以治河功陞右布政丁內艱哀毀卒年  
六十五生平仁慈謹飭孝友睦族工行草書一時爭購  
之

雲間人  
物志

吳黼字廷章華亭人少孤貧讀書無間寒暑登成化二年  
進士知任縣改滕縣擢漳州府同知徙撫州賦性剛直  
始卒不變事上官不肖阿意拂袖歸居鄉面折人過郡  
邑有稅政輒貽書責之課子惟本業日與故人飲酒賦

詩識孫文簡於童子時以女字之所著有一齋集

郭志文苑

陶永淳字質夫華亭人成化二年進士宰魏縣以憂去任  
服闋改南和縣縣民王氏家饒於貲有利之以爲功名  
者誣以妖言淳曰夫以利己而陷人以死禍是可忍邪  
爲雪之歲凶發粟拯飢全活甚衆鄰邑民爭欲乞以爲  
令轉紹興府同知攝府事鋤強植仆決疑辨冤鄰郡事  
不決皆委之以忤直指御史歸後御史敗都御史侶某  
器之昌言於朝俾以禮致仕子驥爲行人

陳志賢達參  
議輔國志

曹時中初名節嫌與漢宦者同名故以字行華亭人泰之  
弟母亡廬墓側蔬食三年有二白鳩巢於廬紫芝數本

產於庭鄉人欲聞之有司辭曰苟如此僕當終身守此  
是絕余仕進路也乃止成化五年登進士官刑部郎出  
僉浙江按察司丁父艱廬墓如前補雲南僉事單車之  
任時境內亢旱蟲食苗幾盡齋素步禱蟲死歲大熟陞  
浙江海道副使勢家聯巨艦捕魚海中千百爲羣爲禁  
戢曉諭犯者坐法無貸條議振刷六事與兩臺左遂乞  
養歸時年四十餘杜門卻軌不通謁守令晚集耆老爲  
安耆會必北向拜闕而後坐性豪飲然終無喪儀喜爲  
懷素草書竟日不倦出入常操一小舟身自搖舫時當  
祭祀則親采蘋藻太守吳公鉞遺之以舟署曰采蘋正

德己巳歲稔貸米百石賑飢又力勸行賑全活萬人時  
中日止蔬食招飲皆不赴曰民苦絕粒而吾輩乃安享  
哉年九十將終時郡守孔公輔贈米二石手書答云老  
夫不食已三日矣恐虛大夫之賜謹辭後二日爲誌以  
別親知端坐而卒

陳志  
賢達

奚昊字時亨華亭人九歲就外傳囊白金爲學貲有婦人  
道哭問之曰家貧鬻絲得百錢而遺之舅姑老無以爲  
饘粥昊卽以金予婦歸告其父父曰兒能如是吾無憂  
矣弱冠父疾刺血額天求以身代又重傷母心匿不以  
聞成化四年領鄉薦明年成進士授刑部主事遷員外



郎勘貴州獄歸奏稱旨進郎中乞歸省遂就養家居數月瑞州有獄久不決昊復受命往訊以奔走勞瘁卒年三十六昊幼時母爲析產悉以讓兄冕所得俸金必分族屬爲比部時同年董令去官道遇寇爲具館穀給綈纊厚贐之使經景州故僚劉判官死五年不能舉昊葬之且卹其家平居恭遜見里中先輩無窮達皆不敢慢處僚案終日不色忤人多愛敬之尤嗜學喜臨晉唐書詩文有奇思多著述李文正東陽志其墓五世孫士龍謹樸不苟取與崇禎十年進士授景陵知縣遷德安府推官捍禦流賊以勞得疾歸卒

郭志名臣

陳獻字播侯華亭人成化七年舉人知清苑縣均力役課

農桑養老尊賢興學造士

畿輔通志

湯全字完之華亭人成化八年進士授刑部主事歷陞員外郎郎中斷獄明允陞貴州按察司副使普安土酋弗靖全往諭服之陞湖廣按察使時武岡知州某以伉直爲岷府所誣全守正力辯其無罪安陸鄭氏有腴田其鄰邱某陰圖之誣鄭盜又假其父逆辭投諸司論死久之父沒全閱案疑之曰子旣淹獄何從逆父捕邱鞠之竟釋鄭其發姦摘伏類如此陞雲南右布政貴州左布政使右副都御史巡撫湖廣尋致仕卒

陳志賢達

顧純字以正華亭人性剛正成化八年進士知高安縣中  
門內有樹或云神所憑能爲禍福吏民禱祀雜遝庭下  
純至曰吾在安得爾命伐之已伐果有異曰其本在爾  
盡斷之乃止自是縣中畏服獄訟屏息入爲刑部主事  
進員外郎時大官有以文章自命恫喝當世者衆咸附  
之純特立不回卒以大計罷歸年五十餘閒居卻埽端  
坐一室縱覽諸經子史尤加意鄉里後進有好學者引  
接訓誘無異子弟自以伉直少容更號顧宏子云陳志賢達  
林濟字敷澤上海人成化十年舉人謁選授沔陽知州修  
職業謹操守威惠大行廢墜畢舉內艱服闋改裕州考

滿卒於京二州人皆有去後思

魯志稿參  
修河陽志

顧綸字惟城華亭人成化十年舉人授大理寺司務尋改  
禮部陞南京刑部郎時劉瑾用事獄以賄成綸按律詳  
審多所平反知馬湖府土司畏服境內肅然請老歸卜  
築白龍潭之南涯年七十九卒所著有寅清紀行碧潭

諸稿

婁志

張穀字濟民上海人祖衡永樂十三年乙未登進士拜監  
察御史侃論不阿卒貶所穀成化乙未進士甲子適周  
鄉人以爲異授中書舍人直內閣尋引疾歸宏治初起  
修憲宗實錄書成同事者皆進官穀止加俸意恬然又

三年陞湖廣參議提督太岳泰和山至周覽嶽祠謂道  
流曰汝輩處此非偶然宜勤修以答天貺是夕沐浴晨  
起更新衣出廳事方執筆判署目微瞑遂卒穀風度清  
遠眉目秀朗如畫與人言從容簡當雖怒無疾言遽色  
事母至孝養二姊終始以禮恬退安雅望而知爲篤行

君子云

郭志  
名臣

三舉字一鳴華亭人世居虹橋父仁樂善好施嘗出粟二  
千石賑飢全活無算撫臣以其事上聞朝廷義之賜八  
品冠帶旌其閭曰尙義之門臬登成化十一年進士授  
行人司行人禮部主事轉員外郎以父年老乞歸父病

泉亦病及父卒泉在牀褥中一慟而絕

奉賢志

岳山字惟重華亭人成化十三年舉人除知光澤縣里胥侵蠹官廩逋負山積山至疏根室孔化竄爲良十年之逋不數月而辦上官才之徙廣昌縣歲大旱步禱雨隨注邑大姓黃氏兄弟爭財久不決山諭以孝弟中分其財感泣罷去丁母憂絕意仕進家居十年未嘗入城府

陳志  
賢達

朱應祥字岐鳳華亭人生有異稟同邑徐主事觀家多藏書應祥盡借讀之於是學益富工古今文書法遒勁嘗與常熟桑民懌杭州張天錫游西湖應祥卽席賦二詩

天錫爲閣筆性闊達不事細謹成化十三年以歲貢薦

南畿未幾卒

通志參修  
何良俊集

孫衍字世延華亭人居洞涇父獻官訓導母任氏卽參政  
勉之女賢而知書衍承家學弱冠領鄉薦成化十四年  
第進士知深沔二州有政聲入爲南京職方司員外郎  
進直駕司郎中中官索舟車無藝衍每裁抑因構大獄  
事白知延平府有盜殺人劫財縣誤以余姓抵罪衍察  
其冤訪得真盜出余於獄羅監生者豪橫人也毆人至  
死行賄賄冀自免衍正其罪時人快之閩俗婚嫁論財  
死者焚其尸衍嚴禁之俗尙一變辛酉夏旱徒步禱烈

日中已而得雨卻蓋冒雨歸遂得疾卒閩人哀之衍少  
貧有志操居官廉謹卒之日室無餘財詩文清麗俊逸  
有雪岑稿若干卷子承恩自有傳

顧志名臣

陳章字一夔華亭人成化十四年進士授刑部主事進員  
外郎郎中時天津有冤獄逮繫百人辭連大臣久不決  
章往勘得其主者置之法餘皆獲釋尙書何喬新尤重  
之獄有疑者輒倚辦有御史按陝西忤權貴繫獄章以  
御史無罪卽罪不至死因鞫之議者觀望不敢決章違  
衆抗言卒白其冤遷湖廣按察副使未行坐從卒犯法  
左遷瑞州府同知陞知高州府時雲爐大桂等賊未平



章以檄招之降者十餘種任事者欲殺之章力爭乃止或遂議撤兵章持不可乃設賞格四出招捕賊遂解散調黃州會御史來勘事檄詣雷州以嵐瘴遘疾卒章少負力學爲人端重言動有則喜爲詩與李東陽謝鐸倡和謫官非其罪又投荒以沒時論惜之

婁志

許璘字文玉華亭人成化十四年進士由行人官御史出爲湖廣僉事以彊力著聞致政歸所居前有空地賃人積竹木日徵雞子數枚以自給每夕陽在戶烏帽布袍扶杖行吟村郭閒年八十終

陳志  
賢達

周洪字廷誥上海人成化十四年進士除蒲圻令勸農力

田植桑麻令婦女業紡績治絲帛驗其勤惰而賞罰之  
高原置筒車下隰創陂堰民以饒給鄉置社學市田三  
十畝令生徒父母合力耕種復其徭役爲教讀資邑有  
犯法者大署木牌於門雖權勢不避置義倉六所儲穀  
三萬石正德初大旱民猶賴之拜御史卒

陳志  
賢達

瞿霆字啓東上海人成化十六年舉人授順天府判偕給  
事中李漢等清理武清七廠葦地繪圖進呈勒石著令  
尋遷左府經歷調後府出知廣南府量移沅江那氏與  
族人相讎殺躬往撫諭那氏陰行千金爲賂霆發其奸  
獻議誅之隨乞休東還作七老會圖畫賦詩時以爲盛

事年八十九卒有南山集

陳志  
賢達

陳瀚字深源華亭人成化十六年舉人在荊州府通判荆俗不善耕種募松人往教之民始知耕織生計饒足以外艱去服闋起濟南監德州稅事竣視常額溢千金悉歸府庫無所私滿九載擢景州守武宗朝中貴橫行就瀚索金執不與坐謫晉州學正久之擢貴州麻哈州守未任乞致政歸瀚性孝友居官一介不取在籍有督學使者某按松侯瀚見積垣不治徐曰入學案未出蓋導使言也瀚曰瀚所不敢聞者有三壞名節一也驕惰人之子弟二也起奔競之風三也學使者歎服其清正如

此陳志  
賢達

李楷華亭人成化初知郟城縣歲饑開倉賑飢繼以官廩全活甚衆捐俸市地十畝爲義冢以葬無主者開墾荒田千七百頃招撫流移復業者七千餘人去後民爲立

碑頌德山東通志

楊松字國用家貧竭力奉親父病痔爲之吮母病不能食刲臂修藥以療後父邁危疾復刲股作羹以進家益落爲傭工贍養有司上其事復其家郭志獨行

居宗晟華亭人成化中母張氏患膈氣疾醫禱弗效宗晟割胷取肝和酒刲股肉爲湯以進母食之尋愈時母年

八十宗晟年五十一矣知縣戴冕將聞於朝不果鄉人

至今稱之

郭志  
獨行

周禪字維敬華亭人爲府掾太守劉璟器之璟以直忤御史黃憲將按以賊罪悉拘諸掾考掠之皆誣服禪獨鳴其冤楚毒備至辭無屈撓黃怒繫之獄或曰此上官意何自苦禪抗言曰賊罪安在如君輩言天理人心漸滅盡矣詰朝覆鞫卒不移事遂解人以方之東漢戴就後補樂平簿改興國尋告歸禪好著述善星數學工草書遠近士大夫皆折節與之交孫思兼自有傳

通志參修  
雲間志略

徐繡字朝威華亭人性端毅心所是非勢利不能奪人謂

之鐵墩言其方且重也官寧都縣丞調宣平竝有惠政  
兩縣人皆立祠祀之而寧都有禦寇功別建思徐亭於

熙熙臺

寧都宣平兩縣志  
參修先進舊聞

朱恩字汝承華亭人居莘莊副使瑄子成化二十年進士  
授行人遷刑部郎中謹曹事不通門謁京師遂稱關門  
朱郎中聞於孝宗擢河南副憲尋晉按察使擢布政時  
都下有礦利中官廖某欲以奇羨自盈咱當路請開之  
恩抗章得罷擢南京副都御史巡視江防沿江要害置  
立水寨又立賞格捕獲者多得金錢盜不敢近遷南吏  
部侍郎進尙書坐事罷歸家居三十年惟以法書名畫

自娛晚歲喜延方士講論丹訣卒年八十五

雲間人物志

金獻民字舜舉世爲上海人居杜行鎮先有成籍在蜀獻民父爵依金祐於蘇州遂以蘇州籍成成化五年進士官山西提學副使獻民成化二十年進士除行人宏治初授御史按雲南順天並著風裁出爲天津副使歷湖廣按察使正德初劉瑾亂政追坐獻民勘天津地不實斥爲民瑾誅起貴州按察使歷南京刑部尙書世宗卽位召爲左都御史遷刑部尙書劾奏奸黨王欽王銓不宜貸死不納尋晉兵部尙書五星聚營室其占主兵請敕天下鎮巡官豫戰守之備且請用賢納諫罷土木屏

玩好帝頗采納獻民伉直有執持帝或不能從卒無所  
徇太監卹福潘傑死詔官其弟姪張欽死以家人李賢  
承廕賢死復欲官其子獻民先後論奏帝皆不從土魯  
番速壇滿速兒寇肅州命兼右都御史總制陝西四鎮  
軍務捷聞還京仍理部事錦衣百戶俞賢中官泰養子  
也以中旨管事獻民言賢本廝養不宜濫竊名器又言  
錦衣副千戶李全王邦奇等冒濫論功皆不聽尋引疾  
歸未幾邦奇訐前尙書彭澤辭連獻民奪職閒住初大  
禮議起獻民數偕廷臣疏諫帝不悅由此得罪隆慶初  
贈太子少保謚端簡子皋正德六年進士翰林院檢討



張正德九年進士工部主事

上海志

張黼字仕欽上海人成化二十三年進士官刑部郎中精法律而不苟有里嫗訟其子不孝者反覆開譬且呼其母爲子理髮皆感泣悔服去每有疑獄必焚香祝天至忘寢食以求其情久之子鳴鳳以御史官南臺一日值御史騶哄於道鳴鳳下馬立他御史疾馳去乃歎曰吾老矣安得復與兒子輩爭衡哉卽日疏乞致仕上嘉其恬退進應天府丞賜歸卒年七十八初黼年五十未第或勸廢學黼曰人雖休吾弗休古人有之請事斯語卒成其志又以晚達父母不得祿養刻親像自隨雖垂老

言及必流涕士林稱爲篤行鳴鳳字世祥與從弟鳴鸞  
同年舉於鄉宏治九年成進士令永康以廉能召爲南  
御史劾大僚張元楨等方議有所譴又上疏論劉瑾被  
逮廷杖削籍瑾誅御史周期雍以爲言復故官仕終湖  
廣副使世宗立賜銀幣將大用之會卒令永康曰武義  
有殺人獄檄使治夜夢緋衣人語之曰得王十一乃了  
厥明物色其人獄遂成明史附見陸崑傳鳴鸞字世和  
正德初會試寓京師時鄉人張文冕方黨奄瑾官錦衣  
氣焰赫然燕鄉之與試者窮極奢侈以示得意鳴鸞獨  
不赴識者高之仕止金華推官

上海志

唐禎字元善華亭人居金匯塘成化二十三年進士金山  
衛學登第自禎始宏治初修憲宗實錄分遣禎往兩浙  
搜訪故實獨詳鎮守中貴人例自尊大禎往報謁見中  
門閉取刺授閤者卽上馬去時謂其婉而得體尋擢駕  
部調儀部哈密貢物濫惡禎在主客司曰是虛名而靡  
我寶賜也且以折估聞使者譁於庭不去使譯諭之曰  
爾斯爾主易爾貢以爲利不爾罪足矣又敢譁邪不聽  
且移文邊關詰爾主罪安歸使者屈服精膳司凡以新  
茶至必先呈樣實則爲私餽相沿已久禎至飭門者正  
供外無得入尋轉郎中卒於京年五十禎丁未待試時

主人女見其獨處窺牖與之言卽趨出徙他舍

陳志賢達

唐琛字廷璧上海人少以孝友聞不樂仕進父疾奔走湯

藥三年如一日成化丁未以恩例授金山衛指揮使琛

力辭澹然榮利士論多之

上海志

馮海號存朴華亭人恩之祖也事父母至孝雖近出入必

長揖以告家合掌橋與莫母鄰二母年皆八十拜爲姊

妹行味必同甘日具潔羞以悅母母疾篤日嘗其糞夕

禱北斗求代死迄半載始瘞然竟以勞苦遺疾垂沒呼

母三日無絕聲里中私諡曰苦孝先生

郭志獨行

黃鑑字明夫學博而家貧年三十未娶李萱慕其賢以女

妻之所齋匱具甚侈悉遣還但以織紉佐薪水晚年結茅千山曰八峯小隱年九十六卒門人錢福爲之傳著

有山樵傳說

郭志  
隱逸

陳泰號檜清華亭人刲股肉愈母疾錢文通志其墓同時有馮汝翼蔣時英皆以割股療父母稱於時

郭志  
獨行

陳忻字用誠幼失怙事母葉氏曲盡誠孝嘗以父不逮養每遇四時祭享慟不欲生宏治二年母病顙天願以身代及卒廬墓三年不人居室有鳩來巢產白雛人謂孝感所致忻平日尤精天文占驗響應博古能詩有蠅鳴

集

郭志  
獨行

錢福字與謙華亭人居聚奎里成化二十二年領鄉薦游  
李東陽門時有以司馬溫公像求東陽作贊東陽屬福  
爲之曰公之在朝拔茅連茹公之在野青苗變法公之  
再起是爲元祐公之云亡是爲靖康東陽大加稱賞宏  
治三年試禮部廷對皆第一授翰林院修撰郡自宋衛  
涇後繼起魁天下者自福始而才又稱之旣第後名聲  
赫奕遠近以牋版乞題者輻湊其門性坦率無町畦有  
犯者笑而受之人尤服其雅量云卒年四十四著有鶴

灘稿

通志參修馮時可  
鶴灘先生遺事

周佩字鳴玉華亭人登宏治三年進士授都水司主事陞

員外郎以母老乞歸養母卒服闋轉刑部郎中時中官  
劉瑾擅政每問人曰刑部周秀才吾不識之何如人佩  
卽疏歸世宗卽位進階中憲大夫優游二十五年卒年  
八十五佩天性孝友致甘露瑞芝之祥竭力以卹族人  
居室之內一榻蕭然晚益喜讀易詩文典雅翰墨皆有  
法

郭志  
文苑

宋愷字舜臣華亭人宏治六年進士授屯田主事轉虞衡  
郎擢廣信守郡當孔道送迎宴犒一切罷革有給事某  
奉詔括民田增畝稅百石愷疏請蠲之丁內艱補建昌  
陞福建參政又改廣西平府江獠蠻賜金帛潯民黎仲

明叛復提兵討平之時奄蓮擅權未嘗以一嫌私往來  
會齋捧入都卽致仕家居二十餘年御緣布袍烏帽人  
不知其爲顯者著有櫟庵集年八十卒

雙志

曹津字元會華亭人世居干巷以歲貢授青陽訓導歷陞  
南安教授課士有程淵貧生卻贈賄著周禮集傳行世  
子穗字泰字諸生家貧至孝研精理學魏忠節幼時執  
經其門卽識爲令器留心著述有易旨太極通書解性  
理雜說尙書解詩本義諸書崇祀鄉賢

胡琬字公炎華亭人居秋涇宏治中以貢上春官試翰林  
吏部皆上第授湖州訓導嚴矩律端軌範以率諸生秩



滿不待遷而歸所居茅屋數楹經年不入城市著茗溪  
漁唱耐庵歸閒諸稿

張時泰字吉甫上海人宏治初以歲貢授秀水訓導性豪  
放澹於仕進秩滿卽告歸以詩酒自娛與錢鶴灘曹定  
庵桑民懌諸人相倡和所著有史記管吟和陶詩皆失  
傳惟續資治通鑑綱目廣義十七卷行世

上海志

顧清字士廉華亭人宏治五年南京鄉試時王鏊爲主考  
閱清文曰昔歐陽子謂當讓蘇子瞻出一頭地斯人是  
也置第一明年成進士改庶吉士授編修晉侍讀正德  
初劉瑾竊柄清絕不與通瑾銜之出爲南京兵部員外

郎瑾誅累擢禮部右侍郎前後請建儲宮罷巡幸疏凡數十上世宗嗣位爲御史李獻所劾罷歸嘉靖六年詔舉老成堪用內閣者廷推及清乃以爲南京禮部右侍郎上言營差四出海內騷然請自今悉付所司停旗校無遣從之旋乞休詔進尙書致仕卒諡文僖著有東江

集

明史參修  
一統志

張震字時震上海人宏治五年舉人官南安司理遷廣州通判以廉惠稱

上海志

黃明字天章華亭人居七寶宏治六年進士授南京刑部主事轉駕部郎凡中官假託公差無敢乘傳勒索者出

守汀州屬邑武平寇發督府提兵會剿衆議括民財充  
餉明出官帑羨金給之陞雲南副使致政歸陸樹聲稱  
其屏居八年鄉里有熟公名而不識公面者曾孫廷鳳  
字孟威官武定知州廷鵠字孟舉官順天通判並有傳  
妻

志

李希顏字原復華亭人居洞涇宏治六年進士授南京刑  
部主事正德初陞廣東僉事齎表入賀時閣豎擅政希  
顏獨不踵其門朝士稱爲鐵腰李進本省右參議露章  
劾梁儲子暴橫奪俸歸尋起原官進雲南提學副使擢  
按察使卒於任性至孝親喪時廬墓三年身不去經喪

還耐窆於封公之側顧清走哭其墓曰我銘原復筆無

愧也

郭志名臣

周杲字啓明華亭人宏治六年進士選授福建建陽令遷御史清慎自矢不名一錢沒後徐文貞階奏聞特恩諭葬杲書法李北海畫師吳仲圭氣韻渾厚高出時流

趙公器上海人以薦任道州知州有善政立法最嚴行之

以恕祝名宦

湖南通志

王杲字景昭華亭人輔子宏治八年舉鄉薦第一十五年登進士授禮部主事轉員外調兵部郎中清約如寒士公餘輒讀書吟詠嘗督視京城風範凝然年四十七卒

於官松江守吳鉞撰壙志

陳志賢達

王良佐字汝弼華亭人宏治八年領鄉薦時年逾五十謁選靜海教諭流賊鈔略郡邑守令往往鼠竄將入境有勸宜少緩者良佐曰吾何避賊卽至有抱祭器罵賊死耳吾何避尋擢廣濟縣令寧藩構禍軍需百出邑弗能供上官督促嚴迫良佐歎曰財非天降地出今民力已竭使我敲骨吸髓祇無益吾不忍爲也卽稱疾謝事歸自是養高邱園不入城市肆力古文辭以撰述自娛著有鶴坡稿孫文簡公刻行之並表其墓

郭志文苑

沈恩字仁甫上海人宏治九年進士授刑部主事忤劉瑾

落職瑾敗復原官歷陞雲南按察使前使涖任率謹事  
黔國府中伏謁隅坐陪其家祭惟謹恩一不爲屈旋按  
其不法事問遣桀黠奴二十餘人黔國怒陰令市肆告  
變將危恩監司上其事廷議竟右恩左黔國尋擢四川  
布政廉知蜀民苦邊糧料價前後奏減二百餘萬兩時  
新都以首相用事蒼頭廬兒稍負勢驕橫恩悉置之法  
新都遺恩大紅絨二且謝不謹恩召僚屬聚堂上立焚  
之新都子中鼎元賀者爭致餽遺恩僅捐俸三兩佐以  
兩蜀輓新都不爲禮恩亟遣使索歸卒以此召怨中考  
功法免歸謝事居鄉未嘗有干請對郡縣有司語多規

切已官方伯徙步數十里送其師朱曜喪卒之日貧無

以斂祀鄉賢巡撫都御史夏邦謨又特爲之祠云

上海志

楊瑋字伯玉華亭人居葉謝仲弟琛季弟璉父欲令璉買  
易瑋曰我家世讀書季獨賈不可乃日夜訓其弟宏治  
九年成進士授營繕司主事戚畹張氏恃寵乾沒商資  
瑋不少假後數撓法遂勘奏論罪奉使過里守張筵款  
之偶賜優人一卮瑋厲聲曰此豈侯度邪守失色還朝  
拜光祿寺寺丞時朝廷日索子鵝腦數十頭餉畫眉鳥  
瑋對中貴言今天下民窮財盡焉能狼籍用物若此武  
宗怒遣使詰責瑋囚服跽午門外劉瑾使使詈曰窮措

大何不知事瑋面斥之瑾怒甚詔謫隰州同知瑾敗擢  
知瀘州時鄧茂七反大司空林俊統兵征勦命瑋招撫  
餘黨乃單騎入賊巢喻以禍福皆解甲降敘平賊功累  
陞四川副使乞致仕璨正德六年進士璉五年舉人時  
人稱瑋璨璉爲三玉隆慶初瑋贈光祿少卿璨字仲玉  
令桐鄉調開化民好訟或仰藥取快小忿生女不舉璨  
痛爲懲創陞刑部主事累官應天府府丞以災異乞休  
子秉義自有傳

陳志  
賢達

曹閔字崇孝上海人宏治九年進士知福建沙縣擢爲南  
京監察御史正德初上疏劾劉瑾下錦衣獄被杖幾死



瑾誅起廣西僉事閔曰一瑾去而衆瑾尙存遂引退年

未五十也養母十年母終廬墓得寒疾卒

陳志  
賢達

唐錦字士綱上海人宏治九年進士與修大明會典旋歸  
侍養銳情著述出爲東明令修大名府志十卷以廉能  
擢兵科給事中清理廣東鹽法查覈積逋百餘萬引時  
劉瑾殘橫錦不與通謫判深州瑾誅晉南繕部轉比部  
郎慮囚湖湘多平反有恤刑錄再督江西學政寧庶人  
反以地方失守落職歸後事白許致仕杜門養重一時  
金石之文多所撰著有龍江夢餘錄及文集若干卷復

修上海志行世

郭志  
文苑

曹豹字文蔚上海人少貧苦爲人踐更發憤力學成化丙午舉於鄉宏治十二年登進士知邳縣稱無害吏立社學毀淫祠秩滿奏最召入將拜臺諫卒邳人德之崇祀名宦雅好吟詠有山居雲程二集

郭志文苑

王一鵬字九萬號西園華亭人宏治中以明經授秦順訓導踰年卽告歸性瀟灑工詩善書畫均入逸品所居西塔街構小齋坐臥其中几上陳古鼎彝茶鐺酒鎗畢具晨起小鬟侍立滌硯換瓶枝日影移輒朗吟不輟客至命酒縱談竟日夜爲笑樂乞詩畫者屢滿戶外又精曉音律時時檀板金尊曼聲自度優游林壑幾三十年不

知人世閒有榮利事也

郭志  
文苑

高企字進之上海人邑諸生爲顧文僖清高弟博綜羣籍能文章知縣鄭洛書嘗稱之曰高生經明行修思齊古

人聘修邑志稱簡要

郭志  
文苑

張武字德勇上海人居貧力學授徒自給潘恭定恩出其門以貢謁選當得府推武雅不樂刑名請以師儒自效遂授弋陽王府教授上保祚箴鑒古錄深見嘉納王賢聲日聞尋懇疏乞歸蕭然一室以著述爲事子大魯令永城有名稱嘗禦流賊師尙詔有功語在王世貞志中

上海志

黃標字良玉上海人藏書甚富繙閱不倦叩以奧義僻事  
具卽響答舅陸文裕臨文有疑義必屬標考核與人談  
經濟鑿鑿可行輯古今說海一百四十二卷選文裕集  
一百卷所著書學異同二十二卷縣志稿十卷俱毀於  
倭惟戊己庚子二卷存

上海志

顧曦字東曙華亭人博學能詩其弔橫雲山詩曰圓堂千  
載寄崇阿石馬無聲墓草多故里尙傳前代事浮萍應  
落逝川波野人夜黑偷金盃山鬼天寒泣翠蘿莫問人  
閒興廢事夕陽回首自悲歌顧文僖以呈李文正公公  
曰不意山林乃有此作同時戚韶王良佐張冕吳爰高

企等十餘人相倡和竝爲時所重

郭志文苑

戚韶字龍淵上海人居唐行鎮博雅好古與王良佐張冕竝以詩名意氣豪邁其詩亦若燕趙閒奇士與孫文簡承恩初未相識作二詩送之北行文簡深重之韶之沒也爲刻其詩以示挂劍之義

郭志文苑

朱承順字履敬華亭人安貧樂道年四十始學詩性高簡居家遵禮訓時祭必先期手滌祭器著有夷白稿又郡中布衣如東野陳榮味苓顧曦一槎陳漢墨潭黃嘉言皆宏治中詩人爲士大夫所禮重者

集志

陳良珊字子珍華亭人與弟良瑚孿生貌相肖人莫能先

後也良珮爲縣學生三試皆第一宏治十二年成進士  
選授山東高唐州知州法令嚴肅人不敢以少年易之  
課最遷刑部主事洊陞郎中出爲湖廣布政使參議改  
福建按察司副使擢廣東布政使在任七年以病乞歸  
弟良瑚號鐵峯宏治十四年舉人官江西建昌通判歸  
里後嘯傲山水以高曠稱

青浦志

潘靜字見山金山衛人父有權宏治中武舉歷官嶺南參  
將以失巡方意罷歸靜棄儒爲吏由乍浦司巡檢陞貴  
州鎮西衛經歷韓襄毅雍用兵兩廣檄爲嚮導入賊巢  
斬級二十餘擒酋長一人師還陞後府都事年四十餘

謝病歸征蠻時所賞銀牌盡散三黨之貧者陸文定遺書招之不往通諸史尤工書法

華亭志

葉鈇字廷用上海人宏治十四年舉人授福州府同知甫下車有二十四人上謁自稱汎商各饋海錯一罌發視皆白金也鈇大駭封識密遣人察之皆海洋劇盜卽詣臺使白其狀請便宜除賊乃伏甲內廨延汎商入飲伏發就擒得劫殺諸不法事悉按誅之賊黨駭散尋擢刑部員外郎晉郎中以論事忤權貴出知臨安府多惠政移疾告歸卒

上海志

張萱字德輝上海人宏治十五年進士授鄱陽令改嵯縣

復改政和擢守茶陵州俗悍多盜稱難理萱至力行保甲竝類編其族有犯者同坐盜稍戢比邑永新民多越境占田歲負稅三百餘石申憲司責永新吏督徵以紓民累內艱服除改潞州適武宗西巡權幸勢張甚譎言欲刷婦女州人洶洶萱請以身當之民倚以安擢湖廣僉事陞參議致政歸卒萱所至有名茶陵人以之方何

武

陳志  
賢達

唐懌字叔和上海人母亡水漿不入口累日父德華沒亦如之事繼母以孝聞弟懌年幼好嬉游懌懸父像哭之慟懌感悟力學登第授職時奄瑾竊枋懌戒以弗負國



家勿畏權幸及權遭譏竄死家室此離撫藐孤如己出  
子孫列膠庠登仕籍者相繼皆以孝友世其家權字季  
和宏治十五年進士官刑曹正德初權以直節忤劉瑾  
瑾銜之誣下詔獄其黨張文冕亦松人也使人求重賂  
權曰我實無罪冤當雪若果有罪則法在安敢以私免  
遂謫穀城令羣公餞之國門賦詩奕棊談笑自若單車  
至縣勤恤民隱見餓孺輒悲歎不食以爲長民之責未  
幾卒於官年三十七

南匯志參  
陳志賢達

張元澄字靜夫華亭人宏治十七年舉人以能書薦詔修  
孝宗實錄入中書劉瑾遣小奄索楷書不爲禮補南昌

府通判寧庶人反澄不屈榜之百羈儀衛司及王文成  
平賊諸從逆悉論罪澄獨奏加三級旋丁內艱以赴闕  
乞銘途次卒澄草書法懷素與東海齊名高麗國購其  
書畫時有南安太守南昌倅東海東山配兩翁句

陳志賢達

陸深字子淵號儼山上海人宏治十四年鄉試舉第一十  
八年成進士授編修劉瑾嫉翰林官亢已悉改外深得  
南京禮部主事瑾誅復職充冊封淮府副使丁丑充會  
試同考官還司業以外艱去薦起爲祭酒設科條懲勸  
士類仲秋丁祭言餘暑未平當用冰著爲令充經筵講  
官輔臣桂萼改其所進講章請自今容講臣得盡其愚

以廣啓沃帝可之卒爲所忌以經筵面奏非故事左遷  
延平府同知擢山西提學副使晉府優人子前入學深  
謂寧可學校缺一人不可以一人玷學校竟斥之陽曲  
生劉某父爲知縣笞死訴於巡按趙鏜鏜底縣反抵生  
罪深力爭不聽因互劾逮問鏜被謫深得直旋補浙江  
晉江西布政司右參政雪冤獄數十人歷四川左布政  
使松茂諸番亂主調兵食有功賜金幣復發帑賑飢全  
活甚衆嘉靖乙未召爲光祿卿轉太常卿兼侍讀學士  
與修玉牒世宗南巡掌行在翰林院印御筆刪侍讀二  
字進詹事府詹事深性嚴毅與朝士少諧武定侯郭勛

方有寵呼之爲跋扈將軍勛嗟焉會九廟災詔百官修  
省請致仕越二載上問侍臣翟璵陸深張邦奇才學孰  
優璵以深對方有意召用卒贈禮部右侍郎諡文裕深  
出入館閣幾四十年練達朝章兼通今古其所論議皆  
可見施行在內數上書言事在外皆有功德於其士民  
尤以文章見所著皆根本典籍切近事理書學顏真卿  
李邕賞鑒博雅爲世莫及崇祀鄉賢子楫字思豫才思  
警敏能文章尤善決策辯難有經世志嘉靖己酉已擬  
解首仍失之日事著作蒹葭堂稿一編鴻識鉅見深中  
歎要竟賈志以沒不獲遂其學

陸氏家傳

顧聽上海人其先顧仲瑛有別業在青龍之新江鄉至孫遂移家其地後析爲青浦宏治十七年舉人授建昌郡丞以慈惠著尋棄官歸自號孤松小隱足不入城市凡三十年集生徒教授躬治園圃卒之日有書數卷布袍竹杖而已

郭志  
隱逸

褚嵩字惟中華亭人正德二年舉人嘉靖中任石阡府知府省夫馬除豪橫課士濟貧以直道不容去部民歎失

怙恃

貴州  
通志

蘇思字從仁華亭人居沙岡正德三年進士知秀水縣邑多豪右有犯卽繩以法以故受中傷被勘按驗無實得

免召爲御史益厲風節疏劾錢寧江彬恃寵驕縱不納  
因乞歸奄黨誅復原官出按四川有大姓占民田奪而  
還之黔其奴同年友爲屬吏通苞苴恩盡發其事怨家  
爭謀下石遽引疾歸後復起巡按廣東抑權豪革和買  
以歲編驛傳首事者最苦定隨糧帶徵法民稱便檄修  
省郡志垂成以事罷去嶺民懷之

廣東通志  
參奉賢志

張紘字文儀上海人少遭閔凶一月七喪營治楸柎竭誠  
盡禮葬畢就試登正德三年進士知桐鄉多惠政擢守  
高唐州時流賊寇高唐紘增墉濬濠料丁壯肄武事賊  
不敢徧部民牒陳某地有窖錢可發發可數十萬不爲

動知嚴處二郡政尙寬簡投劾免歸耕蘆子渡西與傭保相雜作未嘗乘輿行里中一夕攜童子從田閒還舍邏卒以夜行訶止紘謹避詰旦其人知蒲伏陳謝慰諭遣之其寬大類如此嘉靖初用廷臣薦起知建昌府卒環堵蕭然稱清白吏

上海志

姚參字應辰其先平湖人父贅五保張氏因占籍華亭正德五年舉人官上饒教諭陞宜春知縣宜春歲貢茶供億繁費參爲裁節十之九山南賊剽豪四出剽掠參搜捕之縣境界連江西宸濠叛繕完固守遙爲聲援擢工部郎中告歸卒

金山志

沈霽字子公華亭人幼雋穎夏方伯寅一見奇之以女妻焉正德六年進士授行人上疏指斥佞幸擢南京御史時宸濠潛有逆謀霽抗疏言乞斷大義除大逆以安社稷留中不報嬖人江彬誘上游幸霽疏懇回鑒乞斬彬以謝天下又不報世宗登極上封事數千言切中時務遷福建海道副使鎮守中官得危疾餘貲分遺三司霽不受有簡御史者移文海道凡市番船每舟稅百兩霽曰得無攫金於海邪吾司風紀何以訓也簡銜之劾霽守有餘才不足改貴州兵備抵任會蠻寇據山爲逆以計擒之撫按交薦時年近七十遂引疾乞休有旨嘉其



恬退加右參議致仕家居十七年未嘗入郡邑年八十

五無疾而終

陳志賢達

孫承恩字貞甫華亭人正德六年進士改庶吉士授編修時權貴用事引疾不出世宗登極入朝奉使南安與修明倫大典遷左中允充經筵講官主考兩京鄉試陞侍讀學士掌南院召爲少詹事已晉禮部右侍郎轉吏部左侍郎掌詹事府丁未會試主考擢禮部尙書掌詹事府已回部管事時帝方尙元修齋宮設醮承恩獨不肯冠黃冠遂乞歸明年上思之召還故任加太子少保請皇子講讀不報癸丑二月復乞致仕賜馳驛歸壬戌卒

賜祭葬贈太子太保諡文簡著有灤西草堂集承恩直  
項寡言與人文雖所知厚一揖外不能致款曲於書無  
所不窺及對賓客不以資議論雖士大夫賢者罕能測  
其蘊世宗多猜嫌有請告者率見忤承恩獨以醇謹見  
諒且蒙恩禮屢召用皆出御筆云子克宏字允執以父  
廕爲應天府治中嘗攝上元縣釐正糧差縣人德之擢  
漢陽知府忤高拱罷歸築室北俞塘以老允執少敏慧  
博涉羣書氣度蕭遠有晉人風書畫入逸品年七十九  
無疾而逝

妻志

戴恩字子充上海人正德六年進士授工部主事轉員外

郎中擢陝西參議恩恬和警敏初監浙江抽分值歲不  
登多負課恩曰吾寧以是獲罪不能效措克吏也御史  
王堯封因恩言特爲奏免尋職營建出納物料總理勤  
慎先是運木民夫不堪勞役恩疏請用三輔軍士更番  
般運後開寶應裏河增修谷亭上下壩牐驛傳苦煩擾  
恩悉爲區畫往來稱便武宗南巡郡邑吏往往棄印去  
恩獨與總理河道御史龔宏經理供億不爲苛擾以勞  
瘁得疾歸

陳志賢達參  
浙江通志

宋臣字以忠華亭人正德六年進士宰樂清民婦以姦爲  
子所覺與姦夫毒殺之誣里中素有覺者連歲不能決

曾大旱臣爲白其事卽大雨丁艱起補宣黃陞南京工部主事歷員外郎督蘆政以勞致疾卒

陳志賢達

李儒字宗文華亭人居泗涇正德九年進士時錢寧江彬用事儒不樂就官歸慕同里陶九成遺風因號散宜世宗卽位起授建寧府推官祇攜一老僕之在解署蕭然遇疑獄以意求其情僞輒中他聽斷亦不留獄公餘訪問民間疾苦設身處地時爲區畫陞禮部祠祭司主事以親老乞改南祠部陞刑部郎中致仕杜門課子閒入城市不用輿蓋後范惟一爲同卿每於里閭徒步曰吾不敢違先達典型也卒祀鄉賢建寧人祀之名宦

婁志

吳稷字舜鼎華亭人正德九年進士授金華推官時章文  
懿懋家居講學稷嘗造請以質所疑會永康有右姓辱  
其邑令以法懲之拂上官意量移惠州有海豐令以墨  
被劾怙直指勢猶留治事稷露檄逐之忤直指意遷荆  
府左長史改徽府進賢王箴芸窗賦以諷久之致政歸  
隱東郊有司莫識其面里舉踐更役誤報令不知勝之  
中衢稷往往注其下曰不能爲官豈能爲役令聞大愧親  
詣謝終不見也著有自得園稿宦游稿石湖漫稿破愚

錄史綱纂要皇明正學編

通志參修  
雲間志略

楊秉義字士宜璨子正德九年進士授行人遷兵科給事

中時寧庶人有異志諸權幸相比爲姦因引疾歸起吏科給事世宗卽位疏請崇正學親儒臣謹號令絕進獻使詔旨不爲空言章奏不至停閣上嘉納焉中貴江彬以迎立功入掌司禮封弟英爲伯義疏言彬以鷹犬事先帝陛下入嗣大統本出祖訓彬何功而受重賞詔奪兩人官劾侍郎楊儀姦回固寵罷之丁母憂服闋補原官巡視京營上言祖宗重根本計久遠設五府以統四十八衛立三大營以蓄精銳十二團營以備調遣今承平旣久軍日減馬日耗一旦有警何以爲計宜詔兵部選將官實軍伍惜戰馬如祖宗制從之遷右給事中會

考察劾奏大學士張孚敬以下二十四人是秋陳道瀛以黃冠爲太常少卿疏論不報遷禮科左轉吏科都給事尋以病解官卒子允雋甲子舉人

陳志賢達

周鵠字文儀華亭人正德九年進士拜御史巡按福建鎮守中官羅籥驕蹇不法疏奏成遠方武宗南巡疏諫弗報宸濠之變鵠籌軍餉設防禦不以兵事諉守土吏擢知潮州府旋告歸性峭直爲詩文有風致著適齋集藏於家

陳志賢達

胡岳字仲山華亭人正德九年進士授刑部主事歷員外郎出爲四川僉事芒部寇川南岳督兵入山斬木通道

二百里募敢死士斷賊走路合兵殲之捷聞賜金綺由  
江西左布政晉大中丞時崇建郊廟市材楚蜀吏盜官  
錢更賦民或張旗幟擊鼓縱金從徒百餘視民所植出  
黃紙封之縛其主恐喝當自輸京師民號泣爭出錢求  
免岳嚴禁痛懲之民賴以安歲饑上疏請減所輸全活

甚衆改大理卿卒年六十六

陳志  
賢達

張鳴謙字汝益上海人萱長子舉正德十一年鄉薦官溫  
州司理擢順天通判廉正不阿御史張欲令伏謁鳴謙  
祇長揖銜之誣以事逮杖已得白復故官歲餘請骸骨  
歸鳴謙廉謹自守然性好施與內外宗族咸賴周卹卒



年七十四弟鳴岐正德己卯鄉薦授博野令稱廉能子之象自有傳

陳志賢達

朱豹字子文上海人父曜以貢授清江提舉操履剛正人方之陳太邱豹正德十二年進士知奉化縣豪右屏息調任餘姚革里甲短解之弊以最擢監察御史數上封事薦楊一清伍文定奉敕清理江西軍務江西當宸濠變後歲屢荒盜賊竊發豹至發粟賑飢活數萬人釋大辟囚三十餘人尋守福州聞父訃音卽日徒跣行三十里士民追送有泣下者豹性孝友父在行里中未嘗棄肩輿與兄弟處同食遞衣友愛無閒好施與宗黨多待

以舉火所著有福州集行世

上海志

朱鼎字朝和華亭人正德十二年進士任興化推官多異績以剛直失御史意及轉同知陞刑部郎前御史猶力擠之遂拂衣歸構數椽於西郊布衣蔬食以訓子孫五世孫紹堯萬歷四十三年舉人令武強以清節著

婁志

沈東字水南華亭人居璜溪博學善屬文正德閒教授郡西生徒皆成名士徐文貞階其尤著也後司教貴溪階以詩送之有受業幾人房杜侶升堂彌愧侍河汾句擢嘉興府通判轉湖州府同知

張之象字元超上海人少穎異博綜羣籍詩文高絕由國

學謁選時宰欲其撰青詞以進拒不應就浙江按察司  
知事同郡某官僉事爲其長屢檄作文不能得投劾歸  
卜築細林山往來優游遂忘歲月卒年八十一之象有  
高節詩文爲當世所重侍御邢侗觀風入吳趣駕就訪  
時寢疾侗直入坐臥榻握手慰勞恨相見晚問所欲對  
曰老人無他嗜惟嗜邱壑因出所著賣書買山詩示之  
侗賞歎不已青浦縣屠隆爲贈買山錢海上聘修邑志  
品敘詳雅爲世所推所著載藝文中子雲門操尙貞素  
孫齊顏博學嗜古著有屯雲居稿曾孫蘊臣能世其學  
三世竝舉孝廉蘊臣兄寶臣亦有文名

郭志  
文苑

顧斌字德章華亭人宏治十七年舉人正德中知興寧縣  
專務德化不爲束溼有古循吏風事載湖廣通志

按郭志科目表作知新寧  
縣與通志互異未知孰是

王佐字良臣上海人正德十四年舉人爲南安令邑瀕海  
民頑梗多盜稱繁劇佐至清保甲嚴鉤距摘發如神期  
年請歸養撫按留之在任六載操履如一日去之日部  
民送者數千人肖像以祀

南隴志

宋公望字天民華亭人居蕭塘負才名以諸生入國學歷  
試不售幼與顧文僖同學及文僖主試秋闈公望竟不  
入試文僖歸里造慰答曰我兩人交厚不得則損公衡

鑒之明得或疑公私我惟引避可以兩全耳文僖歎服  
父倫以事下獄公望叩御史臺懇冤狀不得白乃上疏  
闕廷有旨下所司覆讞而司讞者竟不爲昭雪公望終  
身抱恨焉所著詩文惜亡於倭亂

奉賢志

張松字以培華亭人正德十四年舉人授吉安通判盜發  
曾狀元墓無主名旁墓數十家坐誣繫獄松廉得主者  
入其室發牀下得髑髏如斗大盜叩頭服云此曾狀元  
頭也由是數十家皆免繫羅狀元有女寡爲夫族所陵  
又搆女不測罪松一訊直之吉安地磽瘠多逋賦松徵  
收逋漕調劑有方督輓至京課第一時夏言枋政思一

見之松往投一刺不復謁言意怏怏補東平知州時工部郎徐楚督徂來泉源曹掾皆貴倨松歎曰天下事俱爲此曹所壞吾安可留邪卽告歸後二十年孫烈成進士亦督徂來泉源候吏迎拜於庭松冠帶出呼諸曹掾謂之曰願諸君皆守法無使我不終日也卒年八十一

陳志  
賢達

富好禮字子超華亭人居祥澤少力學有聲庠序其鄰大賈方擇壻館師某以好禮示意且曰必擇壻無失此人賈笑曰秀才而有此姓甚善雖然吾不願也後登正德十六年進士授屯田主事進刑曹郎京師惡少年以事

抵法好禮執而論之惡少匿詞衣帶間潛入大內疾呼  
因自刎舉朝駭愕上章劾奏不報事竟寢蓋上廉知其  
事且知好禮素清慎獄無冤也會御史馮恩論冢宰汪  
鉉下獄好禮力爭謂無死法鉉以其庇鄉人銜之出守  
重慶時蜀府與都司以事訐奏遣科道按之累月不快  
當事者檄好禮往一斷以法不十日讞成陞副使建昌  
境有大渡河故諸葛武侯渡瀘處行者觸瘴多死好禮  
鑿山開井築海塘堡數百里屬之省城三月而畢會屬  
吏爲民所訟好禮置於理省僚力請不應讒於部使者

遂告歸

南吳舊話參  
雲間人物志

邵山字子靜華亭人正德十六年進士宰龍泉邑多盜急  
則竄伏叢莽閒緩復出山設計討捕之調知臨海陞工  
部主事分司浙江歲多羨額山始以府幕一人監收貯  
之府藏陞員外郎出守溫州時張永嘉起大第強市民  
居山謂曰相公居朝喜稱伊傅周召居家顧不肖爲李  
沆邪且環垣已里許矣張目攝之而地亦不再廣或謂  
相國旦暮召不計他日螯君邪山笑謝曰人生進退榮  
辱皆有定分卽如子言吾便葛巾藜杖浩然歸復何所  
損子視邵子靜何人哉在任二年卒祠名宦

陳志賢達

金璋字秉之上海人正德初輸粟助邊恩授指揮爲人尙



氣誼顧文僖嘗薦之以親老辭嘗建閔行鎮石梁又倡議助役捐田五百畝創義塾營義冢有司以三義旌之

上海志

徐壽字永齡華亭人居七寶鎮父奎嘗捐貲建楊港浜石梁壽少負奇氣甫弱冠卽伏闕上書訟父冤正德中與里人張勳倡義跨蒲匯塘建石橋又於塘之北岸自建石梁十以通泗涇人不病涉嘉靖二十三年歲大饑減直糴米五百石以活飢民事聞錫冠服子沛字澤卿少從周萊峯游以文章行誼著精醫家言治疾輒愈布袍角巾閉門吟詠邑侯屢延賓席不赴著有方壺山人稿

及醫學決疑沛子三重自有傳

郭志獨行

諸璿字廷美號南溪先世魏人宋末避亂徙居三林莊之  
芋溪遂爲上海人好讀書創義塾於所居之旁曰志應  
堂湛若水錢福各爲記以子昱貴贈如其官昱字麗中  
正德十二年進士選庶吉士改禮科給事中世宗入繼  
議大禮偕同官朱鳴陽疏爭後復言興獻稱宗之非兩  
疏載明倫大典轉兵科左給事中出爲江西參議疏辭  
且乞歸不復出鳴琴賦詩以自娛族孫名才字蘊珍能  
詩著有雲溪草堂集

張端本西林雜記參南匯新志

潘奎字用章上海人爲郡掾慈仁好拯物太守御下嚴胥

吏無敢迂有豪甚暴橫捶楚諸臧獲每至殞命逃者卽  
賄役誣奴以盜前後所訟奴四十餘俱論死道路側目  
一日奎伏地爲奴白冤狀并訴豪不法事甚具召諸奴  
覆訊乃悉解放捕豪下獄居一歲守夢諸神導從鼓吹  
送一兒至吏舍醒而念曰必奎家也吾聞有德者必有  
後潘其興乎月給米石賙之後授項城尉攝商水令均  
以惠政聞所生子卽恭定公恩也

上海志

秦敕字曉江上海人裕伯族孫爲諸生慕義若不及修塘  
濬壕一方賴之海濱多斥鹵稅蕩時議改爲糧田民大  
困敕走離院訴其事乃免

南匯新志

李日宣字尙德華亭人父憲義烏訓導日宣與弟日章少  
齊名憲每撫二子喜曰天以此償吾也後日章第進士  
宣乃歎曰有親在堂弟足祿養吾何能與命爭衡隱居  
自樂性嚴毅動遵古人不妄言笑晚好吟詠年八十四  
卒子益亨居恆稟庭訓惟以去泰甚知止知足爲第一  
義益亨子凌雲自有傳

郭志  
獨行

顧定芳字世安上海人祖英傳見前定芳博學多識尤精  
於醫世宗時召拜御醫上問用藥之道對曰用藥如用  
人又問攝生以清心寡欲對上喟然曰定芳儒者也進  
修職郎致仕父母疾以口續食以體藉臥事長嫂如母

撫育幼弟宗黨賴以舉火置學田建義塾故上海令莆田鄭洛書有惠政沒後三喪不舉定芳從莆田市地以葬仍置田歲贍其子姓天下聞而義之子從禮字汝由工書少隨父客金陵時故相國貴溪夏言方游學旅次甚困從禮慨然齎贈三百金後言入閣值世宗狩承天以從禮薦奉詔題十三廟諡號穆宗登極又題世宗神主御容廟號先後被殊賞自中書兼翰林院典籍歷官光祿寺少卿加四品服色致仕初貴溪論死西市親舊莫敢顧視從禮獨收斂歸葬徐文貞稱之曰不背德不邀利真義士也生平篤孝友兄弟六人同居共爨喪祭

務遵古禮上海困倭寇議築城從禮發粟四千餘石築  
小南門以倡始築城六十餘丈濠稱之又捐地建青浦  
縣治並學宮置助役田以蘇民困辛酉大饑出租三千  
斛煮糜飲之卒年八十四配祀周方二公祠弟從義字  
汝和善書能詩嘉靖庚戌詔選端行善書從義名第五  
授中書舍人隆慶初以與修國史成擢大理評事家居  
構玉泓館手摹宋本淳化帖及法書名畫金石鼎彝善  
繪事工署書尤爲文徵明王世貞父子所重有硯山山

人詩稿行世

郭志  
獨行

孫繼祿字汝濂上海人嘉靖元年領鄉薦知開化縣恭慎

有守豪強知畏惜民愛士咸得其心

浙江通志

楊鶴字鳴皋華亭人居漕涇諸生官紹興府知事自常俸外鹽醢皆取之家尋歸奉母潔養備至座客常滿雅詠既輟清酒徐行偶無客至則使家童候水次邀以歸人方之鄭當時友人張一桂貧死鶴載楫村舍襁諸物從百里外往哭既葬始歸尤究心東南財賦著救時論田賦議等篇子子亨自有傳

華亭志